

■ RUMANTSCHS EN LA BASSA

Inscunter cun Jon Albert Fanzun

Sin gievgia sera, ils 5 da mars envida la URB, Uniun da las Rumantschas e dals Rumantschs en la Bassa, agl'emprement interrumantsch dil 2015 en la Gesserei Oerlikon. Ella selegra da saver beneventar sco hosp dalla sera e referent Jon Albert Fanzun, collavuratur personal da cusseglier federal Didier Burkhalter, e per la part musicala il pianist Roman Deuber. Jon Albert Fanzun ei naschiu e carschius si a Tarasp. Leu ha el frequentau la scola primara e lu la secundaria a Scuol. Dapi l'elecziun da Didier Burkhalter sco commember dil cussegl federal svizzer igl onn 2009 ei Jon Albert Fanzun siu collavuratur personal ed in dils dus schefs da siu cabinet. Il 2014 ha el planisau ed accumpignau igl onn presidial da Didier Burkhalter ed oravontut era ses viadis ed inscunters sco president dalla Organisaziun per segirezia e cooperaziun en Europa OSCE. Jon Albert Fanzun raquenta da sia lavur multifara e fa bilantscha digl onn presidial cun ina agenda extrem emplenida marcada da grondas sfidas politicas nazionalas ed internaziunalas. El raquenta dalla lavur davos las culissas



Secund da seniester sper cusseglier federal Didier Burkhalter Jon Albert Fanzun a caschun dad in inscunter digl onn vargau. Sto esser che Fanzun ha cussegliu bein siu schef.

per inscunters cun dils pli impurtants politichers dall'Europa e dil mund. Roman Deuber, il giuven pianist che accumpogna musicalmeint tras la sera, ha fatg avon dus onns il «Master of Arts in Music» a Lucerna. Roman ei carschius si en ina famiglia bilingua romontscha/tudestga, capescha e discuora romontsch. Siu stil musical d'interpretar e d'improvisar la musica da jazz e musica parentada fascinescha il publicum. Ei vegn offeriu in aperitiv. Tier in bien sitg dat ei era temps e peda per in bien discuos. Ins sa era empustar ina fina tscheina. Vegni tuts da lunsch e da maneivel cun amitgas ed amitgs, enconuschentas ed enconuschents per guder ensemen cun vegls e novs enconuschents ina interessanta e divertenta sera.

La serada entscheiva entuorn las 19.00. Ins sa era vegnir pli tard cura ch'igl ei. Sin seveser ils 5 da mars ad Oerlikon. La Giesserei ei da contonscher naven dalla staziun Oerlikon en ca. 10 minutas a pei en direcziun da Regensbergbrücke tras Affolternstr.–Oleanderstr.–Regensbergstr.–Birchstr.

Per la URB: Ciril Berther

■ 2014

Stà in onn catastrofal – per milliuns

(anr) Adina pli brutalas furmas da violenza armada han caracterisà l'onn 2014. Quai constatescha Amnesty International (AI), l'organisaziun per ils dretgs umans, en ses rapport annual. La fatscha dals conflicts armads saja sa midada. AI appellescha perquai a l'entira cuminanza umana da tschertgar novas respostas per las raschuns ed uschia impedir quai.

2014 saja stà in onn catastrofal per milliuns carstgauns, daventads unfrendas da conflicts, violenza barbarica e repressiun tras stadis e gruppas armadas. La violenza, ch'escaleschia sin l'entir mund, saja la raschun ch'il dumber da fugitivs creschia enorm. En 160 pajais statti fitg mal cun la situaziun dals dretgs umans. Sch'ils pusents n'interprendian nagut ed ageschian immediat vesia igl ora fitg stgir era per quest onn.

Amnesty International crititgescha massiv il cussegl da segirezza da l'UNO. Quel haja disdi totalmain tar ils conflicts en Siria, Irac, Gaza, Israel ed en l'Ucraina. El n'haja interprendi nagut en vista als sgarshaiVELs malfatgs cunter la populaziun civila. Interess colliads ed opportunissem politic impedeschian da prender las mesiras necessarias. Appellà vegn perquai als tschintg commembers stabels dal cussegl da segirezza da renunziar tar cas da genocid ed autras massivas brutalitads a lur dretg dal veto.

Pertutgant la Svizra ha AI crititgà cun-tervenziuns pertutgant il scumond d'extradir e l'applicaziun da violenza tar expulsar.

■ FORUM

Nua ei la nova signalisaziun ed embelliziun?

Avon 8 (otg!) meins (ils 15 da zercladur 2014) ha il pievel da Mustér dau in credit da 350 000 francs per ina nova embelliziun, signalisaziun ed informaziun. El messadi veva la suprastanza communal dertg ch'ei fetschi prescha, gronda prescha. La claustra festiveschi igl onn 2014 1400 onns dapi sia fundaziun. «Cun la realisaziun dil project d'embelliziun, signalisaziun ed informaziun dat la vischnaunca la duida atenziun a quei giubileum extraordinari ed ademplescha in postulat gia daditg desiderau.» La suprastanza communal aveva pia empermess al pievel che quei project vegni realisau immediat e quei per festivar il giubileum dalla claustra, pia la stad 2014.

Jeu hai lu giu criticau ch'ins vegni per aschi tard cun quei project. Ins savevi daditg che la claustra festiveschi il giubileum. Sch'ins vegli gidar la claustra e reconuscher sia gronda muntada e prestaziun per l'entira vallada, lu seigi ei pli prudent da dar ina summa generusa e pli gronda per la restauraziun dalla baselgia claustrala. Quei vali dapli ch'in per tablas.

In project buca bein prepara e ponderaus

Il cussegl da vischnaunca veva gia giu dau ils 11 d'avrel 2014 il credit. Silsuenter han 97 vischinas e vischins giavischau che quei project vegni suttamess alla votaziun dil pievel. Jeu ed in grond diember da vischins eran numnadamein dil meini che quei project seigi buca cumplets, cuntegni sbagls inacceptabls e ch'ins sappi buca tgei ch'el cuosti tut en tut. Perquei seigi la fatschenta da remetter alla suprastanza communal e pretender ch'ella presenti «ina caussa clara e cumpleta e che risguardi nossas atgnadads e nossas particularitads». Ultra da quei seigien era ils uclauns da risguardar.

En La Quotidiana dils 10 da zercladur 2014 (In project buca cumplets) hai jeu denter auter constatau ch'il referendum hagi giu in effect fetg positiv, «numnadamein che la populaziun seigi finalmeint vegnida informada sur da quei ch'ei previu. Senza quei fuss tut iu el zuppau». Pli navon seigi ei semussau ch'il project, che ei vegni suttamess alla votaziun dil pie-

vel, correspundeva buca diltut cun quel ch'il cussegl da vischnaunca ha giu approbau. Certas parts hagian ins strihau, midau giu ni schizun in summa schau curdar!!

Buca teniu quei ch'ins ha giu empermess al pievel

Jeu hai adina puspei dertg ch'ei drovi ina meglia comparsa dil vitg. «Nus duvrein in beinvegni simpatic all'entrada dil vitg. Enzatgei tipic per nus, enzatgei original. Nus duvrein era ina nova signalisaziun ed informaziun, quei fatg negin che dubeta. Perquei drova ei denton in concept cumplet che risguarda tut quels elements (ed era ils uclauns) e che correspunda a nies clima (dismessa dalla neiv).» Il votant stoppi saver ordavon tgei ch'il project cumplet cuosti. Quei ein stadas mias salvas e mes dubis. Ei para ch'ieu hagi giu raschun.

Ustiers, hoteliers, commerciants ed ils representants dalla claustra ein denton stai dil meini ch'ins stoppi realisar immediat quella nova signalisaziun, oravontut pervia dil giubileum dalla

claustra. Biebein la mesadad (55 percents) dils votants han schau perschudar e dertg gie.

Neginas informaziuns

Tgei ei capitau en quels org meins? Nua ei la nova signalisaziun? Igl atun 2014 han ins fatg experiments cun «batlinis» alla staziun. Quei ha dau bia da paterlar e da discussiunar. Era la dertgira nauscha ei s'occupada cun quei tema.

Pli tard eis ei vegniu postau in ual da bandieras sper la staziun. Quellas ein lu svanidas. La populaziun ha danovamein survegniu neginas informaziuns! Nuot! Perquei sedamonda la populaziun tgei ch'ei capitau cun quei project, approbaus dil pievel? Nua ein ils 350 000 francs svani? Votantas e votants han il dretg da saver tgei che schabegia cun lur decisziuns. Ni ei il project vegnius mess en truchet? En mintga cass semuossa ei ch'els dubis dils 97 vischins e vischinas ein stai pli che giustificai. Uss essan nus spanegiai sin la risposta dalla suprastanza communal.

Rico de Castelberg, Mustér

■ FORUM

Charta averta

Pertocca Columna da Corado Niggli «Lhiindrup». Legiand la columna da Corado Niggli bada cun plaschair cha'l hom d'un pajais ester ais integrà, respettà. Seis ritem personal vain acceptà. El es fugitiv, ha gnü occasiun d'imprender tudais-ch per pudair discorrer cun nus. As vaiva'l fat spranza da pudair restar in Svizra, lavurar e guadagnar svesv seis da viver?

O vaiva'l sperà cha ün di regna pasch ed uorden in sia patria ed el pudess tuornar in seis vegl ravuogel?

Ne ün ne l'oter ais il cas, el vain dischlocà a Landquart in ün champ, undanà da vegetar sainza lavur e perspectivias.

Incliegia qualchün ün tal agir? Eu brich. Edith Grass-Vinzens, Zezras



FOTO S. ROTHMUND



Jeu sentel mo in desideri
Ad in sentir:
Dieus laschi mei en tiu santeri
Ruassar, durmir.

Alfons Tuor

Giachen Degonda

7-5-1948 – 8-12-2014

Engraziament cordial

Per ils numerus mussaments da condolientscha che nus havein astgau retscheiver a caschun dalla mort da nies car Giachen.

Als spirituals per il dign survetsch divin, sco era a tuts che han embelliu la sontga messa, schein nus in grond Dieus paghi.

Nus engraziem zun fetg a tuts ch'han priu peda da far ina viseta a Giachen duront ils onns da sia liunga malsogna ed oravontut a quels che han segidau cun el en siu sufragi.

Nus tunschein il maun engraziend per las donaziuns en favur dad ovras caritativas, per las sontgas messas e las bellezia fluras.

Per il liung e bien tractament medical in Dieus paghi als miedis dres. Richard Cathomas, Thomas Lechmann e Tarcisi Maissen. Medemamein engraziem fetg alla Casa sogn Martin Trun, nua che Giachen ha astgau guder ses davos meins en in fetg cordial e simpatic contuorn.

Segner, dai a nies car Giachen la bein meritada pagaglia ed il ruas perpeten.

Rabius, fevrer 2015

Las familias en malencurada